

## ՀՆԴԿԱՍՏԱՆԻ ՀԱՆՐԱՊԵՏՈՒԹՅԱՆ ՕՐԸ ՄԱՐԴԱՍԻՐԱԿԱՆ ՃԵՄԱՐԱՆՈՒՄ

Հունվարի 26-ին ինչպես ողջ Հնդկաստանում, այնպես էլ Կալկաթայի հայոց Մարդասիրական ճեմարանում հանդիսավորությամբ նշվեց Հնդկաստանի Հանրապետության օրը: 1950 թ. այս օրը սկսեց կիրառվել Հնդկաստանի Հանրապետության սահմանադրությունը:

Ծափողջույնների ներքո Մարդասիրական ճեմարանի կառավարիչ Տ. Օշական վրդ. Գյուլգյուլյանը բարձրացրեց Հնդկաստանի Հանրապետության դրոշը, որից հետո ճեմարանականները կատարեցին Հնդկաստանի Հանրապետության օրհներգը:

Այնուհետև օրվա խորհրդի նշանակությանն անդրադարձավ Հայր Օշականը՝ ջերմորեն շնորհավորելով բոլոր ներկաներին այս տոնի առիթով և ընդգծելով ամեն մի ժողովրդի կյանքում սահմանադրության և ի սկզբանե մարդուն տրված ազատության գիտակցության կարևորությունը: Հայր Սուրբն ուրախությամբ նաև արձանագրեց, որ ոգևորիչ և պարտավորեցնող է տեսնել, թե ինչպե՛ս է օրեցօր շենանում և հզորանում Հնդկաստանի նման բազմազգ և բազմակրոն երկիրը՝ առաջընթաց արձանագրելով տարբեր բնագավառներում:

«Այսօր նվիրական օր է Հնդկաստանի պատմության մեջ, քանզի ամենքս հավաքվել ենք մեր խոնարհումը բերելու Մահաթմա Գանդիի և ազատության մյուս նվիրյալների պայծառ հիշատակին: Ճիշտ է, Մահաթմա Գանդին չկարողացավ իր կենդանության օրոք տեսնել այս օրը, բայց նրա հետևորդների և այլ նվիրյալների հետևողական ջանքերի և երկարատև պայքարի շնորհիվ սահմանադրությունը և նրանից բխող դրույթները գործադրվեցին Հնդկաստանում: Մեր աղոթքն ու խնդրանքը պիտի լինի Ամենաբարձրյալին, որպեսզի Աստված յուրաքանչյուրիս մեջ ավելացնի նախանձախնդրության, նվիրումի և սիրո ոգին՝ ամենքիս վստահված առաքելությունն ու պարտականությունները կատարելու համար», - նշեց Օշական վարդապետը:

Վերջում սաներին և ներկաներին իր խոսքն ուղղեց նաև ճեմարանի տնօրեն Ջեյմս Դայասը՝ ընդգծելով, որ անդուլ աշխատանքի և նվիրվածության շնորհիվ է միայն հնարավոր է՛լ ավելի զորացած և բարգավաճ տեսնել Հնդկաստանը:

Հանդիսությանը մասնակցում էին ճեմարանի ողջ պաշտոնեությունն ու բոլոր սաները:

*ԴԻՎԱՆ ԿԱԼ ԿԱԹՈՍԻ ՀԱՅ ՀԱՄԱՅՆՔԻ*